

Lettres du Roy

PORTANTS DEFENSES A TOVTES PERSONNES de ne violer & enfraindre les Edicts de Pacification, Maiorité, & autres: sur peine de la vie.

Auec inionction de repurger la ville de Paris, des vacabons & gens in-vtiles.



A PARIS,

Par Robert Estienne Imprimeur du Roy.

M. D. L X V I.

Auec priuilege dudit Seigneur.



De par le Roy.

NOSTRE amé & feal, nous auons esté aduertis qu'il y a plusieurs de nos subiects qui portent si peu de reuerence & obeissance à nos Edicts de Pacification & Maiorité, & aux autres Edicts & ordonnances, que auons faict expedier pour l'establissement du repos & tranquillité publique de tout nostre Royaume, qu'ils ne craignent de les violer & d'y contreuenir ordinairement: De façon qu'il ne fault point doubter, si telles contrauentiōs

& desobeissances continuent, qu'elles ne soyent pour produire effects du tout contraires à nostre susdicté intention: & en alterant le repos ia establi en nostredit Royaulme, à y susciter nouueaux troubles & alterations entre nos subiects.

Pour à quoy pourueoir, & mesmes en nostre ville de Paris, qui est capitale de nostredit Royaulme, vous mandons, commandons & expressément enioignons, que incontinent la presente receue, vous ayez à faire publier & notifier en nostreditte ville de Paris à son de trompe & cry public és lieux accoustumez à faire cris & publications: Que aucuns, de quelque qualité & condition qu'ils soyent, ne ayent à violer & enfreindre tant en nostreditte ville de Paris, que en la Preuosté & Viconté d'icelle, nos susdicts Edicts de Pacification & Maio-

rité, & autres Edicts, Declarations & ordonnances par nous-faiçtes pour l'establiſſemēt du repos d'entre noſdicts ſubieçts: Mais pour le deuoir de l'obeiſſance qu'ils nous doiuent, les entretiennent, gardent & obſeruent inuiolablement, & ſans y contreuenir en quelque ſorte ou maniere que ce ſoit: & ce ſur peine de la vie. Et là où aucuns ſe trouuerōt faiſans le contraire, procédez alencontre d'eux par les ſuſdictes peines, & autres indiçtes par noſdicts Edicts, Ordonnances & declaratiōs, ainſi qu'il eſt de iuſtice & de raiſon. Et au demeurant pouruoyez à repurger noſtre dicte ville du grand nombre de vacabons, & autres gens inutiles qui ſ'y retrouuent pour le iourd'huy, & qui ſ'y retirent encores tous les iours: Et vous y employez avec tel deuoir, ſoing & diligence, que noſtre dicte ville en demeu

re deschargee, les habitans en viuent
en plus grande seureté, & nous ayons
occasion de nous en contenter: & n'y
faites faulte. Car tel est nostre plai-
sir. Donnée à sainct Maur des fosses
ce vingtieme iour de Nouembre,
l'an mil cinq cens soixante six.

Signé

CHARLES.

Et au dessoubs,

BOVRDIN.

Et sur la superscription est escript,

A nostre amé & feal le Preuost de Paris,
ou son Lieutenant.

LES lettres missiues du Roy contenues cy
dessus, ont esté leues & publiees à son de trom-
pe & cry public par les carrefours, lieux &
places accoustumez à faire cris & publica-
tions en ceste ville de Paris, par moy Pas-
quier Rossignol sergent Crieur pour le Roy
en la ville, Preuosté & Viconté de Paris, ac-
compagné de Michel Noiret, commis par le
Roy pour trompette esdicts lieux, le leudy
vingt & vnieme iour de Nouembre, l'an mil
cinq cens soixante six.

ROSSIGNOL.

EXTRACT DV

Privilege.

PAR lettres patentes du Roy, donnees à Paris le xviii iour de Ianuier, mil cinq cens soixante trois, signees Par le Roy en son Conseil, BOVRDIN, & scelees du grand seal dudiect Seigneur en cire iaulne sur simple queue: Confirmatiues d'autres lettres patentes donnees à saint Germain en Laye le' viii Octobre, M. D. LXI, signees Par le Roy, Vous Monsieur le Chancelier present, DE L'AVBESPINE, & scelees comme dessus: Verifiees en la Cour de Parlement à Paris le xviii iour de Feburier audiect an: Il est permis à Robert Estienne son Imprimeur ordinaire, d'imprimer ou faire imprimer, vendre & debiter tous Edicts, Ordonnances, Mandemens & Lettres patentes: sans qu'autres Libraires & Imprimeurs les puissent imprimer, ne faire imprimer durant le temps & terme contenu esdictes Lettres patentes, si ce n'est du vouloir & consentement dudiect Estienne. Sur peine de confiscation desdicts liures, & d'amende arbitraire, & autres amendes, despens, dommages & interests dudiect Estienne.